

黎文僖公集

黎文僖公集卷之十

序

送劉思莊還永新序

廬陵永新多故家今之劉氏其甲乙也劉之彥諱靜思  
字思莊前僉都御史左君鼎為其女叔之夫故予亦恒  
與還往其里嫻進士馬自強稱之曰思莊襟度瀟灑脫  
畧世故不可以勢屈利誘然樂吟詠喜交遊鄉人縉紳  
君子雅器重之昔左君既第進士為御史陞叅政進位  
今職諸子姪尚幼恪守廉介而家益貧思莊輒往來經  
紀其家初為奉其女叔來京師聚處逮今左君捐館舍  
家室蕭然思莊聞訃復不遠數千里躬來臨哭且奉其

樞歸葬其厚姻婭篤始終如一斯亦人所難也子素重  
思莊聞自強所稱益信夫詩書子姪之多賢也夫趨勢  
者勢窮則散尚利者利盡則離此人之常情也以今薦  
紳之家方其都高爵食厚祿嫺戚滿門賓從雜遝相與  
道古今而譽盛德彼誠謂有勢可貴利可富故趨而尚  
之耳一旦榮辱升沉炎涼異態則向之奔走承順者且  
將自為吳越雖有故舊今安在哉左君九原不可作已  
思莊不相與歎洽於生前而與致隆於歿後勢利無營  
恩義是篤曾子曰彼以其富我以吾仁彼以其爵我以  
吾義斯亦庶幾乎仁義之道者其賢於人遠矣哉昔者  
鍾皓之於李膺程滂之於蘇老泉皆為女叔之夫而蘇

李二君所以奉之者各極恩愛思莊事雖不同親親之仁長長之義一也其行也廬陵諸君子各賦詩贈之自強徵予序故序以弁諸首

送進士潘公瑞歸省序

皇上復登寶位紀元之春臨軒發策賜信豐潘君公瑞登進士高第觀大司馬政以晉其榮越明年三月君乃上疏闕下謂臣仰荷鴻庥策名黃甲顧惟教育之恩實由祖父之賢開導誘掖以成就之也茲幸有斗升之祿欲迎吾祖父以就養而皆已老不可求矣菽水奉歡心馳神動冀得一歸省以慰所望於下誠局勝感乎上以孝思名教所關持詔有司從之將戒行鄉同年劉

東之來徵文為別洪惟我國家教育賢俊深仁厚澤  
百年涵煦至於登名進士尤厚禮待豈有他哉冀其盡  
忠與孝而已矣然未有外孝而能忠者人舍此而他求  
烏足以為人夫上之仁恕推及百僚然後君亦得以遂  
其親親之願君今縱觀兩京下暨四國試求其祖孫重  
廢身致顯融者有幾人歟求其父子兄弟怡怡一堂而  
世濟其義實及父兄者又有幾人歟今我既兼得之則  
吾一家之親欣躍感戴所以報上之賜曷有窮耶且進  
士者

天子所自取則其任官亦多在前後左右君歸而求之  
事親敬長之間何者非學乎能知致親悅豫而父子化

且定則吾之學識可以職論思知深愛和氣足以祗服  
厥事則吾之材器可以給近侍知柔聲以與貴難之義  
同則吾之謇諤可以司風紀知以父母喜怒為喜怒而  
各中節則吾之詳明可以理郡縣知父母所欲為者皆  
子職之當為而無敢惰則吾之勤慎可以分卽署諸司  
之任物物考之事事求之而又積之厚養之深操之固  
且久將來所進豈可量乎而上之委任簡注亦又何厚  
哉君春而往秋而來予日望之於是羣賢相與饒之崇  
文門外酒既行東之舉爵祝之曰推恩以及親仁也移  
孝以忠君義也仁義無盡吾子勉之遂書之為贈行序

慶劉孟元授給事中序

皇上龍飛紀元之初賜天下士舉甲科者三百而吾荆楚則十五人預選焉甚盛舉也十五人惟衡陽劉孟元春秋最富才與學最優然觀政都憲臺已五閱寒暑矣乃天順辛巳夏四月二十有二日甫獲需次擢兵科給事中荆楚縉紳士因相謂曰今江漢以南黃門鮮預孟元由名進士歷試餘數年乃膺是任將必炳江漢之靈為斯文之慶閭里之光天下四方之榮幸矣乎遂相率謁文以華之夫惟給事中天子之近臣也以其供事殿中故曰給事中其為職有記注之任焉有敷奏之責焉又有彈劾糾駁之柄焉非常職也粵昔虞周之世雖未設此官然如左史記言右史記事即此記注之任龍

作納言出納朕命即此敷奏之責庶頑諛說有掌贊王  
子奪有官又即此彈覈繳駁之柄也故曰三代以前無  
給事之名而有其實逮秦始有給事黃門之職漢唐始  
有給事黃門侍郎左右給事中然侍郎之職無闕獻納  
門下之省分隸中書雖云封還繳駁亦於君德邈然矣  
故曰三代之後無給事之實而有其名然則名與實無  
內與外貫滿官守言責而周密詳盡可經久者其惟我  
明世之六科乃爾乎夫言動必錄信史有光可謂極名  
器之清條納昌言對仗承旨可謂極官資之要班先文  
武分諫垣之獻替地近冕旒司憲府之激揚九六卿五軍  
之事實審之實行之其未當者得論而裁之又可謂極



委任之專名器清則記注之任所由重官資要則敷奏  
之責所由嚴委任專則彈覈繳駁之柄又所由貴慎孟  
元尚謹此三大節而圖盡乃心也哉潔生平之操履清  
之實也貫百立之典章要之體也廓休休樂善之量而  
行之以謙又專之法也毋<sub>非</sub>乃行毋<sub>非</sub>乃功毋<sub>非</sub>偏乃度  
用成此三大節如唐褚登善由起居以進僕射宋蘇子  
瞻由右史以署玉堂有不<sub>難</sub>政者矣予忝益元同年且  
偕法從之列鄉曲誼重政不以佞而以規

贈周宗德陞光祿署丞序

天順三年夏四月二日光祿監事岷山周顯宗德氏既  
滿秩銓曹課其績最且疏以聞

上詔陞宗德光祿掌醢署丞進其舊職而勉其新功也其鄉縉紳士咸榮之相與置酒高會而尚書工部員外郎沈應禎來徵贈言始宗德以材幹見 即有聲於公卿間暨入官光祿益端乃操履益慎乃言行益擴乃見聞襟度而恣然乎有爲矣列卿庶尹其禮待恒加於衆僚今又進之官階秩七品即增其祿與位而不改其地其榮矣哉光祿

天子御膳之官也周禮內饔食醫掌和王之六食六飯六膳百羞百醫八珍之劑而內膳上士二人中士四人凡進食必先嘗之當時自酒漿藟豆下至醢醢飴鹽之人率皆冢宰所掌也或者謂冢宰統百官均四海此微

物非所當急不知古聖人脩德自飲食始冢宰掌猶得  
以節冗費而養天和醯醢飴鹽正所當急者迨隋門下  
省得統尚食局此意猶存至唐改奉膳大夫掌供常膳  
而古道遂泯泯無聞矣哉

朝法古為治因時制宜光祿分四署而設官掌之總以  
正卿貳以丞佐此非成周建官之遺意也耶而凡祭祀  
宴享供奉之需歲計萬億征歛有藝費出有經良法美  
意貽範來今而超軼往古其盛矣哉宗德於此必上體  
周公之心下參我

朝之制而拊衷以已所問學庶以律身勤以集事公以  
制物見之明守之固而行之久將來崇階峻秩此殆其

權輿也歟而周之上士隋之大夫亦豈不可馴至于  
嘉宗德之賢可與惇行古道因其請遂申論以勗之

竹蓀草堂詩序

秣陵侈山水之勝濱大江南岸有沙河景所聚處也沙  
河之上有草堂陳竒寶氏居之陳之先出漢太丘長寔  
自江州義門分筠之跑泉繼遷渝之水北至

國朝洪武間竒寶之父全華守景週始家秣陵峽石今  
為秣陵人竒寶思振起厥先復沙河肯構此堂以恢前  
烈也間來京師

朝之縉紳士以詩鳴者各為協音律以昌之而司大理  
務金大用屬予序嗟夫子於草堂未獲躬造將何言大

用曰奇寶氏讀書而尚文不樂榮利其為人器度偉智  
識明而施予廣博斯堂之作於古道亦庶幾焉蓋語其  
所生則有田可稼有水可漁有澤可樵有地可牧歲事  
咸備矣語其所適意則鍾阜峙南瓜步鎮北龍潭沙河  
環抱東西而竹水花卉足供觴詠四美可兼得矣語其  
所嗣先而傳後則樂志琴書慶延詩禮日與藝文儒術  
之士逝而風化又可敦崇矣初非若流連光景以廢時  
事之比也予曰嘻若是則秣陵山水之勝信萃於斯諸  
篇之作燦月露而驅風雲于以道揚其美於無窮亦宜  
矣雖然究草堂之名不若求草堂之實泛觀其景於外  
不若近思其理於中予於此尚有告焉斯堂也誠為予

文無疆之業乎必也崇忠信以厚址基達仁義以通道  
路本孝弟以建棟梁由禮義以開門戶養廉耻以固藩  
離備誠敬以為什器至於簾帷枕席倉庾帑藏凡所布  
置無一而非道德之所寓焉如是則不徒其景之具美  
而實其理之通融以是而貽厥孫謀尤善且遠者也斯  
又發諸篇之餘意而於吾奇寶亦素所願為者因其請  
也備書以冠諸簡元

### 靜齋詩集序

靜齋詩集一卷今瑞陽郡文學莆田林英文華編其父  
用宏先生遺稿也先生沒已二紀餘手澤尚新文華以  
示子徵為序夫發言成章謂之文而詩又文之精華也

君子觀詩道之隆替可以驗世道之盛衰古詩三百篇  
早已聖人刪之非徒尚其文亦將以為世道計耳下此  
一變而為騷再變而為選三變而為歌行詞調則去古  
已遠而聖人刪詩之意殆泯泯焉後世論詩者率有取  
於盛唐非以三百年崇文之治氣還渾雅時則有若李  
杜韓柳諸人詩道至此而始昌耶先生莆陽大家生有  
異質涵泳詩書之澤而講授於鄉先達之門發為詩文  
氣充理暢專法盛唐其古風淡而駛其聲律清而雅其  
長歌短引則思深而飄逸蓋庶幾韓柳諸人之心法也  
先生之志鑒鑒乎欲追古作者之為於此可以見國家  
詩道之隆況使在當時得沾一命翱翔乎鑾坡鳳沼之

問掌

帝之制則金璫琳琅之篇鋪張贊頌必有以昭  
聖德而闡鴻猷惜乎終晦山林年幾強仕賣志以沒也  
然先生雖不獲效用當時有子如文華之賢紹緝其遺  
言亦足以發潛德之幽光然則是編也可以壽先生之  
名於無窮矣先生別有古文若干卷文華他日類為一  
編鋟梓行之韓子曰無亦使其無傳焉可也

贈寧元善陞刑部員外郎序

用刑所以輔教之不及惟博學者能盡之夫萃天下之  
獄而付之秋官風俗不同則聽斷殊也民情不同則制  
用異也苟學不博則亮理有未明理不明則裁律有未



當刑何自中平故以進士而擢行人以行人而陞秋官  
卿屬斯博學君子而制刑之道在是矣祁陽寧君良宇  
元善初以俊選魁正統丙辰鄉薦明年第進士高第擢  
官行人屬時邦家寧謐四方無虞六轡載驅周爰海內  
嘗過齊魯而揖蒙羽之靈道青徐而覽海岱之秀經雍  
豫而訪周秦漢晉唐宋之道適吳楚甌越而尋瀛洛關  
閩之舊南臨滇海北抵居庸東涉遼陽西行寧夏凡所  
至求古簡編邀四三章甫逢掖士講論尋繹之以開  
心胃增益其耳目恢弘其才猷智識為學之博者  
加此九載秩滿天官書其績最遂陞今尚書刑部  
元善以天下見聞而求天下之情以天下為

理而斷天下之獄因其罪而罪之陽舒也可輕而輕不  
至於縱陰歛也可重而重不至於苛酌而歸之合人情  
宜土俗所以輔教化之不及者豈小補哉昔周禮大司  
寇屬有上士蓋員外之任也而當時蘇公敬用長王國  
故周公令太史書之垂法後人異時若杜景佺為員外  
郎執法不撓令狐峘為員外郎稱古遺直其亦有得於  
此歟我國家用人致治與周並駕愚所望於元善者  
又欲儷美蘇公敬爾由獄以祈天永命於無窮使祿與  
位偕進後之官屬皆於此取法可也元善既遷諸皇華  
故人相與置酒高會屬予贈言予因序次元善之學而  
期之以亟於遠大云

贈鄭公實知藥州序

昆陵鄭公實魁南畿鄉薦擢天順丁丑進士高等觀大  
司空政已三年矣維時

聖天子總覽萬幾日勤民事州郡守長斷自宸衷有  
司奉承德意亦慎簡擇而公實遂以老成名進士擢牧  
藥州方恩命既下縉紳士知公實者皆曰茲當儒術柄  
用之期公實以宏材第甲科雖給侍從登津要無手不  
可而乃勞以州郡之職未足展其抱負也其不知公實  
者又曰平藥雄據幽燕俗尚豪武而公實專業文事以  
文事化武民非積久罔克成功必轉而尚嚴明之治乃  
克濟也予謂此二說皆非也夫謂州郡不足以盡進士之

能則其所論者私私則徇物而無以通天下之志矣  
文事不足以變豪武則其所見者偏偏則聽事而無以  
成天下之功矣乃若所言蓋謂平樂在今輦轂之下太  
平之治百年涵育世變風移此其民皆  
帝之赤子也而進士取之制科亦皆

帝之親臣也治化自近以達遠德澤由親以及疏簡親  
臣牧赤子於畿甸之間是即乾坤宗子擇家相之賢者  
以養育其家人而天工人其代之也惟如此而見我

國家用人之公愛民之篤而科目實賢之不偶臨治者  
烏足知此歟公實通敏而特達謹厚而周詳智識有餘  
而不露鋒鐸斯行也尚敬念夫天意之有在也哉庶以

持已公以接人勤慎以集庶事處僚屬有恩遇將校有禮而制群吏有紀綱以視民所利病而建革之教養蒸行不苛以傷於猛不縱以病於寬酌而歸之中俾六事咸底於就緒然後天德脩天事舉而天道亦由此順成政通人和百度具作所謂天工人代豈不於公實信有徵歟公實懋之異時碣石蒼蒼昭達令名封水洋洋流衍餘澤如漢世循吏璽書勉勵增秩賜金或錫爵土拜輔相而垂芳信史為無窮之羨者吾尚於公實有待焉公實之行冬官諸大夫以同朝之雅相與祖餞都門而其同鄉尚書員外郎沈應禎來徵言贈故徵諸天以辭之

贈張宗器陞知太原府序

天子以仁民為職而奉宣德意達之斯民者郡太守之責也夫璫璫室而為郡民之仰吾仁以為生聚者奚啻億萬餘然上焉藩臬欲其奉承也下焉州縣欲其區處也太守以中大夫介處綱目之間所以正其綱分其目使各獲攸當任亦匪輕故非得才有為德有容節操有持守且久恒者則心雖仁矣而政或窒而不行恩弗下流焉吾於今太守張君之賢知斯民得親被其仁也信然矣君名瓚字宗器世為楚孝感令族舉正統戊辰進士高第拜尚書工部虞衡主事九載進秩郎中虞衡為冬官煩劇之司而君踐歷既久政務益通克展謀猷以

割裁宮室器用營建之需克弘識量以周濟百工群臣  
飢寒之急請託不可以勢而撓也干謁不可以利而誘  
也赫然政蹟中外著聞所謂才也德也節操也斯三者  
聖天子知之冬官卿知之而內外百辟皆知之用是甫  
終一考陞今職其榮矣哉山西統三大郡而太原特雄  
西疆我朝太平仁義之治百年涵煦民淳以古君往  
也將益敏乃智能益溥乃惠澤益崇乃貞固之行本之  
仁以養民則田野闢本之仁以教民則學校興本之仁  
以治民則賦稅均戶口增訟與盜可簡而息古者六事  
責成郡守而兼盡一仁之內其於應酬藩臬區處州縣  
乎何有而其政蹟大綱舉衆目張秩然有叙豈不賢於

佐冬官時乎自予入官翰林鄉縉紳之賢皆辱與游其名實尤傑然者則尊禮而矜式之若君者所謂尊禮而矜式之者也然今遽遠違矣莫資麗澤尚冀君久於厥道異時賜璽增秩顯融超達又豈不能廣其一郡以為天下之仁乎若然則君之賢為天下之賢而予輩粉榆結好登龍門並仙舟者尚亦有榮焉君之行予既屬同官柯孟時贈以言而後敬書此蓋相期於任重道遠云耳

### 安晚堂詩序

堂以安晚名志循理也夫前勞後逸事理當然而天道始於動終於靜時乎靜矣而不知所安則天道有遠而事悖焉況望其有以獲天之福哉吾於今安晚堂有以



知金川德器公羽肅公樂循理而福無窮矣肅金川右族  
至翁而慶澤益弘早年奉其母幹蠶於家嘗跋涉八千  
里外扶其父瀋藩屬之襯以歸時其兄大器遠服賈而  
弟良器在幼翁克自樹立遂以資雄充萬石長勤勞役  
事餘二十年迄今已逾七望八久動思靜乃作斯堂投  
倦翼於故林息游鱗於舊壑耳或樵於山則異乎向者  
馳卓馬冒風塵以奔走之時也或漁於水則異乎向者  
犯波濤觸蛟龍以涉濟之時也或絃於泉石觴於郊園  
則皆與昔之光景殊矣燕坐高堂子姓森列而稱觴上  
壽優游莫年明無人非幽無鬼責浩然俯仰之間此理  
之所在即福之所在其為樂復何有加於此歟間來京

師朝之縉紳士以詩鳴者俱為協音律以播揚之而知  
壽州進士羅丕訓屬引諸首予因是竊嘆世之人其溺  
於貴者皆知安於名也而不知名者實之蠹其溺於富  
者皆知安於利也而不知利者義之害豈若今晚而圖  
靜脫略名利惟理是循乎循理而充安之則天道以順  
而福履綏之未可涯矣馬諸篇之作璀璨珠玉鏗鏘韶  
濩颯颯乎治世之音是皆主於理勝者予因序之使後  
之人陟降斯堂圖為繼述尚亦有以壽斯理於無窮哉  
送李景淵知潞州序

天順五年歲辛巳夏四月二十有二日朔陰李侯景淵  
以太學高等拜知山西之潞州先是潞州守闕有司以

謂上黨壺關之地古稱雄豪政未易立非得才有為節  
有守德與學俱優者不可使為之牧也故遲而簡之越  
半載餘及得李侯則卿大夫稱其賢士庶人服其善凡  
上黨壺關有事京師者皆鼓舞歡忻如獲父母之來矣  
於是朝之縉紳士相與祖餞都門而進士王師德微言  
為贈侯之弟景和舉進士為翰林庶吉士予辱交最厚  
侯亦往還熟其烏得辭夫君子以躋顯仕為榮不躋顯  
仕道不得行也小民以獲賢牧為幸不獲賢牧惠莫與  
施也侯一舉而進階五品大夫字育數千里則道可由  
此而行路子國曠數十年而獲吾景淵之賢復古循良  
則惠可由此而施此即上下交而其志同也亨嘉之會

宜偶然歟。邇數年來予忝纂脩之任。凡澤潞事備。之蓋潞彫勝居天下之脊。肘京洛而履蒲津。倚太原而跨河朔。封疆之險也。潞之風土氣高。敢為剛毅而多材武質。直而少詘。訟習俗之雅也。至其民人則醇古而易治。繁庶而勤生。有金鐵稻粱材木藥餌之利。又生理之蕃也。侯其酌時宜而應變也哉。慎固封守。所以抗制形勝之雄。脩明教化。所以崇尚風土之厚。順天時與地利。和遂百物。又所以豐殖民人。生理之蕃。此三者廢其一。非所以善治矣。昔溫太真守上黨。以武功稱。姚元之刺潞州。以德化顯。他如李抱真。郝士義。馬知節。尹師魯輩。或以寬或以嚴。或以廉介。或以仁惠。皆著名潞州者。侯

敬勉之懋立此三善治無負今有司所選又安知異日  
名位不與此諸人並駕齊驅也耶於是樽俎既陳僕夫  
載道歌驪駒之詩以侑觴各一獻酬再拜以別

慶饒蕃昌壽七十詩序

天生人皆予之以壽而所以得壽有三品焉一曰福壽  
謂德盛則福全而享高壽如三皇皆千餘歲堯二百餘  
歲舜百有十歲孔子所謂大德必得其壽是也二曰仁  
壽謂仁者靜而有常故壽如睢陽五老皆年近期頤耆  
英諸老皆年踰耄孟子所謂天下達尊是也三曰仙  
壽謂服氣鍊精以固元陽故亦可以延壽如廣成子千  
一百歲彭祖八百歲老聃二百餘歲朱子所謂刀圭一

入口白日生時翰是也夫福壽者聖神之事固不可易  
為仙壽者偷生天地亦非所當為然則君子康寧壽考  
福履綏之白首一節服清名而保終吉其惟仁壽乎臨  
川崇溪泉石翁饒蕃昌者此豈非今之獲壽者耶翁生  
於洪武戊辰冬十月十日歷甲子四百有三十矣予聞  
翁之為人蹈常履素心存天理無澆漓之習刻薄之行  
此其仁於身者也子姓滿庭皆森蘭茁而皆教之孝弟  
忠信勿事侈靡此其仁於家者也貲雄一邑而孜孜樂  
善施予益勤此又其仁於鄉黨里鄰者也嘗慨其先有  
雋神童科者二人作樓曰兩奇久而圯廢復重建之為  
藏脩所而進德之功老弗倦焉用是血氣軌循精神內

固堅實精明悠遠博厚享茲遐壽久而彌健良由此歟  
古者年七十君問則席杖於國不俟朝尊高年也故張  
昌言張景元俱年七十預者英會張東之七十餘召對  
賢良蘇子由七十講春秋當時皆以為榮播之聲詩傳  
邇不已若翁者又何讓焉鄉縉紳作詩以相祝願長篇  
短什輝煌金玉宜矣於是其子會衆賓置酒張樂以為  
慶其里端王侍御景次諸作屬予序之予因三品壽且  
以仁壽為已然者若福壽則當勉而及之仙壽所不屑  
為者也臨川多名士試以予言驗焉

送夏時秀掌教銅梁序

時秀世家華容之南山前來安貳令公爵仲子也公爵

世永樂宣德間以忠義顯其治家甚嚴整詩言禮立足  
以成就諸子及選鄉遂遺時秀游鄉校而家慶遠流世  
濟其美云然時秀處韋涇之列朝經史而暮絃歌者凡  
二十年餘矣七試鄉闈俱弗偶每一失意歸必進學一  
倍天順壬午春始膺貢士春官雋高等外胄監士之出  
處遲速信當行法以俟而不可强求歟維時四方校官  
多闕有

詔凡新貢士願優仕以學者允所請而時秀以白髮在  
堂祿養志篤不可過也遂援例復試之擢名高第拜教  
諭蜀之銅梁於是鄉縉紳京仕者嘉其彊仕有時且得  
以行道屬為文用貴其行始予具員弟子時秀事時秀



當其群英講學雖五經並授然惟伏氏一經乃獨盛發  
於吾容庠也時秀於伏氏經尤所深得為諸公矜式其  
同時講肄以是躋膺仕登津要者前進士毛廷貴今吏  
科給事中程道遠江西道監察御史董國器新息貳教  
陳俊之而予之庸陋亦在講授中他如俊選劉時起劉  
孟鶴雷士弘時起之弟時雍廷貴之弟廷義予之姪民  
政皆鄉閭秀出而國器時雍則又皆鄉榜第一人焉論  
者謂時秀一房乃獨若此多賢且同一時際出夫孰知  
其問學源流有所自也蓋時秀暨予諸人皆讀書外來  
會文相益其楷範法程則吉豐儒士陳公懿羅山教諭  
何邦寧實表正之邦寧之學得之進士李振玉振玉得

之教諭元與善與善得之少師楊弘濟而邦寧壯年及  
予輩又皆師事公懿焉公懿之學實王與畊真派所傳  
推其源流遠有端緒流風餘韻迄今盛發固宜然也噫  
得師派之真傳者其指授必明染鄉邦之美化者其抱  
負必正職此以淑善後人雖道可成就而況於取功名  
建事業乎然則巴川之地瑤環瑜珥森然粹然以薦天  
廷以供清廟固已素備又得吾時秀分其流沐以琢磨  
之則愈多愈美明效大驗寧不超軼吾客庠而亢竊盛  
哉師者綱常之禎幹人道所由發明者也巴川何幸而  
有師如此凡坐春風立門雪者尚必能自得師然後有  
成歟請書此為贈若夫書最陟明之典江編脩序已詳

茲不復贅

慶監察御史蘇克和受勅命序

人君登崇俊良以共成天下之治其澤施民物功在國家者錫恩命以貴其身且推及其父母妻室如成周制追崇之禮達乎諸侯大夫漢唐宋盛時小大人臣皆有制冊所以獎忠義勸方來也故曰君使臣以禮人臣顯被尊崇之寵溥沾曠蕩之恩如宅洛諸大臣受命篤弼皆明作有功於褒賞之餘有官守者脩其職有言責者盡其忠所以效勤誠圖報稱也故曰臣事君以忠禮者上使下之要道不以忠曠而禮弗恭忠者下事上之實心不以禮䟽而忠弗罄禮忠兼致熙皞用臻者茲於我

國家見之其盛矣哉福建道監察御史蘇君燮字克和  
世為吾南郡石首人前浙之崇德簿叔鼎孫也領正統  
辛酉鄉薦雋乙榜教諭宜興內鄉凡九年矣所在士風  
丕振科第彙征景泰丙子來奏績書最銓曹尋膺

朝命簡任今職惟克和能推其講堂經史之功達而為  
憲府激揚之事不以察為明其政自行不以刻為威其  
人自服嘗巡察都城暨按行裏河諸道俱清謹名著越  
天順庚辰春三載考稱遂得援例賜勅贈其父子魁如  
已官階文林郎母為太孺人封厥配劉為孺人需澤汪  
洋被及幽顯上以發九原遺德之馨下以昭六察光榮  
之慶是則我

皇上之恩禮所以加於克和者不其至乎吾知克和繼  
今以往氣益清臺院之蘭節愈勁府庭之柏以論奏則  
補過拾遺言無不盡豁然聰明之開廣也以彈劾則繩  
違糾慝誅無不當凜然鷹鷂之搏擊也以治事斷獄則  
可使鐵生面雨隨車毅然風紀之振揚也是則克和之  
忠敬所以報答於我

皇上者又不其盡乎勅命一頒而上下交泰如此聖人  
之言豈我誣哉雖然職業脩則名位進茲既拜七品之  
勅異時陞華陟要則五品以上之誥亦可庶得此特其  
權輿焉耳克和勉之惟時寮案諸君子相與置酒高會  
而徵言於予故書此以俟

送李正奇歸文江序

國家制薦舉以羅天下之賢其懷材抱德者有司推轂以聞此漢世續食偕計之遺法準的於今而用之也然必歷試諸難非閱四三年六五年莫磨一命是故非樂功名為親仕者不需岑若是久若其山林念重薄進取厚退脩者類拂袂而歸矣文江李君正奇世家邑富溪里之望族也幼已穎異為前輩所稱暨從游鄉塾師益勤誦肄其禮度溫然文詞粹然而名稱亦籍然嘗以舉子業試鄉闈不偶歸益懋進前功鄉人矜式之歲丁丑天順紀元邑大夫知其賢應詔舉之即其家促以就道茲來京師僑寓已閱三霜而階尚未陞志殊倦焉

予進士大宗伯屬周敬同其友嫻厚者每對縉紳稱述  
厥美且拉予過從正奇輒命小酌與談論終日詞豐理  
贍良快所聞酒酣正奇輒浩歌曰昔我初生四方孤矢  
今我逖遊庭闈萬里乃心故園乃身帝畿瞻彼白雲  
採服在茲予領之正奇又歌曰黃金築臺考槃賦詩富  
貴在天功名有時青山白雲心馳騁矣式遄其歸歲其  
莫矣予又領之乃退語敬同曰昔莊烏仕楚而為越吟  
若正奇者其亦越鳥巢南枝而馳心乎仁山字水之間  
也耶未幾果偕敬同來叙別予因是嘵嘆夫資格限天  
下之賢而所謂山林念重薄進取厚退脩者茲乃於正  
奇見之求諸古人其庶幾矣雖然國家尊使賢能恩禮

無窮正奇由此而大肆力於學則異時鶚飛鵬翥再入  
羅英之網豈無有大於今日者哉正奇最之敬同請贈  
之言遂為書此

黃巖蔡氏族譜序

蔡於黃巖為著姓厥彥曰得輔今清唐巡尉得助之兄  
也得助初仕岳陽以清謹稱予辱友善及遷清唐來京  
師請老遂持得輔遺太學時所編族譜圖求予序蔡之  
先本姬姓周文王第十四子蔡叔度始封於蔡其後蔡  
仲嗣爵子孫以國為氏今江南北多蔡姓豈其流裔歟  
黃巖之蔡繇宋德祐間有萬十朝奉者始自臨海南風  
徙家邑之南山即其始遷祖也朝奉別號松壑子二人



彥文彥愷彥文子四人錐鈕銓鎬彥愷子四人鈔鎬銓  
錠而二派之分扶疎蔓衍蕃熾以鉅焉鎬為鄉善人其  
仲子成伯生得輔昆季皆業文藝銓元未仕至象山主  
簿庶介不阿其子宗伯生得遠暨得明允閱歷五世家  
統中覆而又皆有子若孫繩繼以起得明之孫端璞輩  
又克建祠堂以摯先世神靈立家塾以訓育群從何其  
盛哉古者諸侯自適子而次有大宗以重其本有小宗  
以聯其支而四時之祭於廟則子姓昆弟無不在焉所  
以統宗合族周且詳如此故其知親親之重本後世宗  
法廢祭法不明民始離拆渙散無所統一君子欲惇倫  
彛以厚風俗非譜牒是講而何從取歟然世之言譜者

大抵好強附其所難附昔老泉為蘇譜因其可知者紀之終五世耳五世之上亦一世而止自今稱譜法得宗法之遺意率惟此耳蔡氏之世次與蘇氏無異其闕疑謹審不妄之意又皆有得於蘇氏之遺法予於是將益信蔡氏之文獻有足徵焉嗟夫宗法之親親仁之愛也蘇譜之據實禮之嚴也仁禮者君子保家國之要道凡其子孫世守弗失斯足以壽慶澤於無窮矣

贈宋民表寓鄉闌序

君子發身以科目為重重科目所以重斯文也重斯文所以為天下國家計也然其生稟也有自其造就也有由其遭逢也有命數光嶽之氣不完則生稟齒師友之

功不備則造就偏珠玉在淵鑑衡未遇則遭逢之時難  
必是故士或一舉而高擢或再舉而超遷或累舉而始  
成名位乃加於先達此物之不齊抑亦理勢使然也君  
子毋拘其偶然之數而務盡其必然之理斯可謂善處  
世矣宋端民表氏其先東魯人永樂間大父仕湘楚留  
家長沙故今為長沙人天順初吾入官翰林民表之父  
懋德在寮案間最協恭者以鄉曲之雅民表偕諸俊茂  
亦皆使來質難疑民表忠信而謙和與人交久益親厚  
諸俊彥亦皆破厓岸傾心腹以益之無間炎涼無曠昕  
名吾偕懋德驗其所學且日進未嘗不期之遠大也越  
三年己卯當大比民表泝厥本原往歸魯國會群英角

藝於鄉侯凡三試俱中程度一舉而登名薦書列在傳  
等擢秀於年富之時濟美於聯芳之日而發達顯榮於  
儒術柄用之

朝此吾所謂生稟之有自也就造之有由也而遭逢之  
有命數也斯三者民表皆兼有之足以為邦家之光閭  
里之榮父兄師友之慶吾安得不深喜慰乎夫仁者不  
溺志而安小成智者不恃才而隳遠畧民表因此而益  
懋進脩擢秀春闈策名黃甲大魁天下內焉給侍從登  
鄉佐外焉寄岳牧司風紀以樹功名以崇事業實權輿  
於此也君子重斯文而為國家天下計者責有攸在民  
表其敬勗之予日望之民表來京師懋德已陞秩出判

新安郡椿桂並秀縉紳有光於是諸俊彥相與徵言贈之故書此以竢且為諸俊彥勸焉

慶展鍾秀拜監察御史序

御史古官也然官雖建於古而責實重於今周官五史御史以中士下士為之特傳命記事之官耳至漢則以御史平章報奏而兼察劾之任焉唐則以御史分劾百官而兼公訟之事焉逮至我朝察劾也公訟也言事也此三者皆委諸御史是又兼周漢唐宋之任而摠付一職責任之重何以加此乎是故分道列秩類簡諸名進士為之

聖人深意有攸在矣進士者朝廷親擇之士御史者

邦家親信之臣以親信之臣而委諸親擇之士夫然後  
得以行其學術展其材猷而建立其功名事業也天順  
紀元之初賜進士及第出身者三百人明年簡其器識  
之優者八人入都臺歷試諸難而吾閩西展鍾秀預焉  
又明年鍾秀課優等拜河南道監察御史年方富力益  
強而名位益通顯其將指適人物樹風采以彰察劾之  
公旌別淑慝勤聽斷以明獄訟之務獻替可否納忠讜  
以效言事之誠集周漢唐宋家之諸美致之今日達之天  
下其於榜登龍虎固有莫大之榮而凡交遊縉紳之士  
素與嗅芝蘭而結金石者豈不亦有無窮之美哉是可  
預為鍾秀慶矣惟時泰寧侯陳公汪暨在

朝諸君子相與徵文於予遂書此為之張本

送白致和知平陽府序

公字致和陝之清澗名家齋舉正統戊辰進士高第入翰林為庶吉士得徧閱中秘圖書以增益聞見材器甚豐焉學成拜尚書工部主事陞員外郎尋調戶部再陞戶部山西司郎中公立

朝逾十有四年庶而不騁其譽公而不伐其能勤慎而不惰其職業吏懾威嚴民懷寬惠侃侃有蓋臣風烈信哉其成名也越天順辛巳冬遂以大臣論薦陞知山西平陽府此則顯忠遂良常典收在所謂民之師帥承流而宣化者於公有專任矣維時汾晉人士之官于

朝者咸鼓舞忻忭自慶其得良牧守而大理評事薛公  
義玉來徵文以壯其行惟平陽古冀州之域即帝堯舊  
都也今考其風土則君子雄武小人節儉有敦龐之俗  
焉覽其形勝則中條內蟠潼關外拱有險阻之勢焉觀  
其景致則又汾河絳水襟帶左右太行王屋森立先後  
有秀麗之資焉陶唐植業於此信有取其地與民也我  
國家法天立道去陶唐之世僅五千餘年而斟酌古今  
之宜釐平陽以建府治至於政平訟理施惠一方則付  
之良二千石此陶唐州牧侯伯之任也夫陶唐外有州  
牧侯伯庶政惟和萬國咸寧而今之政即古之政也今  
之民亦即古之民也將使益進其廉益擴其公益懋其



勤慎俾今之風土形勝悉熙熙允升於於變時雍之日  
則今之功名事業又豈不復與陶唐州牧侯伯並驅矣  
乎公勉圖之然則能致陶唐熙皞之治則亦宜受陶唐  
步明之典異時最績屢書治平為天下第一殆見疇咨  
若時或入而熙帝載或出而建藩侯古人不得專美於  
前矣於是祖餞都門載歌甘棠之三章酒既三行書此  
以別

送監察御史馬負圖陞福建按察使序

陽翟馬公負圖壯歲領河南鄉薦擢景泰辛未進士甲  
科拜監察御史兩考餘矣天順七年歲癸未當朝覲之  
期

聖天子舉虞周課功計治之典大合羣有司而黜陟其  
幽明者於是八閩廉鎮謝事去而公遂以大臣僉舉斷  
自宸衷陞按察使總憲紀於八閩焉濱行尚書刑部郎  
中歐陽時熙以同年之雅徵予言以豔其行始公任御  
史時有聲臺省嘗奉命巡歷晉楚諸大藩所至以剋民  
患剔吏蠹煦枯槁樹風化為已任不踰年民之弱者以  
立橫者以服吏之廉者得志貪者縮手蓋其有志功名  
而能爾也然在當時同袍故舊皆已遷擢公獨安常守  
素多歷年所此非所謂志於功名者富貴不足以動其  
心乎然則迄今不次簡拔廉鎮閩海凡制度科條皆其  
素講而行之者予以廓憲量而當大任則器局素宏也

于以礪憲節而表庶官則操履素端也于以振憲威而興吏治則材幹素敏也于以達憲體而周時變則識見素明也于以脩憲事而宣德澤則政務素勤也于以暢憲情而採風謠則氣容素粹也廓憲量者仁之公礪憲節者禮之執振憲威者義之盡達憲體者智之周脩憲事者職之忠暢憲情者意之厚曰仁曰禮曰義曰智曰忠曰厚此六者皆古人道德之當務公懋進焉功名之立亦其餘事耳又非所謂志於道德者功名不足以動其心乎吾於是知功名者用之所以行道德者體之所以具非可岐而二之公於八閩體用兼致將使其君子化道德之風小人被道德之澤而

聖天子登明選公具有令典又將來道德之輔啓迪簡拔置諸廊廟豈徒功名是殉哉立言取其大者予楚人熟公之政茲故舉其大者贈之亦欲求公於古人而不取槩例以今人也

慶周本清拜監察御史序

往者鄉曲貢英相與契合金蘭執經問難於甯子之師其親愛也如彼今者爵祿勸賢凡人一人拜命則衆人各致其安富尊榮之慶靡或敢後其敬重也又如此禮乎曰禮也窮無所養則私不見助於友達無所施則公不見信於人惟若子輔仁之益貫窮達而無間久而敬之是則禮之當然也謂之役於勢可乎曰非也禮因時而

制宜時有顯晦則禮節文是有道存焉不繫勢之輕重也監察御史武昌周君源字本清偕今吏科給事中程道遠監察御史董國器袁廷佐尚書戶部員外郎陳易之主事王良玉皆景泰庚午湖湘鄉榜俊英也皆國子助教黃先生成美高第弟子也然諸賢既已先優仕聯班鵬鷺獨本清最後起采芹藻餘十二年始獲簡授入都憲臺理刑獄又歷半歲始拜山東道今職此非其時之有待至是方大顯歟然吾見諸賢愛厚本清如風日之麗晴天貴重本清如金玉之登清廟遠期待本清如鵬鷺擊海一日萬里而無難必至於職風紀司憲綱始足滿所願歟此則所謂君子輔仁之益貫窮達而無間

久而敬之之禮當然也諸賢政暇間相與置酒高會  
本清慶先生乃屬予叙論其事予嘉諸賢之禮因時致  
隆而不戾道不為勢安得不喜聞而樂道之哉嗟夫御  
史者今國家耳目之官也本清魁梧謹愿有守有學  
必克舉揚厥任繼今明四目使視遠惟明者在此達四  
聰使聽德惟聰者在此彰善殛惡省風流化以陞華踐  
要高躋顯融者亦在此宏廓達施之道為諸賢先為吾  
道榮於遠大殆未可量也本清懋之本清南楚鉅族其  
大父伯仲掌幕永清有善政父職正統間輸粟千石濟  
飢奉勅旌義士蓋家慶有自云

送固安令李宗正書最還任序

王者崇進士科以舉天下賢材無非為世道計也而古今進士多歷州縣以登津要此於世道為得計乎曰世道以用人而安然人之見用者類皆經吏治為俗流棄民事為末節不屑為之君子知吏治在學術所當請民事在官政所當行舉而委諸進士進士有學有守足以辦此而無負焉於世道良為得計而信不誣也曰今為州縣者何如曰建官所以治民然彼以明經貢者或老荒智不勝繁劇之勞由常布薦者多淺陋力莫堪勢利之枕惟進士其年富其力强非老荒淺陋之可憂也其大涵養大抱負恒願於今施設以酬素志也其荷恩榮感激奮發每圖為報稱不能自暇也此州縣民所

以皆慕進士為乃師帥 上每用之州縣亦皆克稱佳  
使有由然矣曰斯其人可備舉歟曰我天順初一科為  
州縣者七十有六人皆足以當此而固安令李侯宗正  
則出乎其類者也固安密邇輦轂初宗正既視篆遭值  
舊令姜藩之餘吏彊而縱民險而寡心恒患焉為之却  
智殫力取利病之尤急者而建革之正體統中憲章黜  
姦黜鋤豪橫均徭役督耕稼蠲逋負振流亡靖刑獄賑  
孤寡省征歛伏供億達公署以開縣治嚴條教以義士  
風肅禁令以除盜賊如是者凡歷半年然後彊者服困  
者蘇廢者興病者愈廢政一新得以自立而民賴之以  
安矣昔孔子自言其為政期月紀綱布三年治功成今



固安紀綱治功亦庶幾乎此所謂世道之安繫於吏治  
與民事進士先辦之而無負者非宗正其誰哉彼世之  
人不屑為州縣者視宗正之得民心建功業流聲譽不  
亦負所學而可為愧哉歲癸未宗正滿一考來報政有  
司書其績最具疏以聞 詔復任以終其惠於是同榜  
諸君子相率為祖張餞之而尚書刑部主事熊性安獨  
贈以言嗟夫郎官列宿英華也昔宋之進士如張復之  
以崇陽令官顯冬卿寇平仲以巴東令位登樞要而皆  
同出一榜彼何人哉宗正最焉吾知固安不足以盡乃  
之材必也匹休張冠進為嚴鄭以為我  
國家無疆之休斯其義矣此又舉賢材為世道之計之

大者請書此以殲云

送袁邦固知晉安州序

晉安為貴藩屬州去京師踰萬里蓋唐虞荒服成周鎮藩之地也入我 國朝來始冠帶其人民而州縣之擇良牧伯為之父母百年聲教漸凝中華

聖人一視同仁之功於斯至矣新化袁公寧字邦固正統丁卯湖藩鄉薦高等士也屢辭乙榜卒業南雍尋歷通政司事益廣問學天順癸未春試藝銓曹擢居魁品逐拜奉訓大夫秩從五品知晉安州事君子藏器於身待時而動其遭逢有如此者是亦無負於所學哉濱行尚書吏部稽勲主事劉光祖以鄉曲之雅率縉紳為祖

帳以別屬予序其事用表贈言之仁夫聖人之政因俗  
致治君子之道隨時處中公之學術誠大且遠矣然晉  
安深隔萬山苗夷雜處不因俗隨時何以施設歟所謂  
因俗隨時者廡以端其本則身有威勤以集其事則職  
無曠寬以順其情則政無擾靜以鎮其俗則衆不驚曰  
廡曰勤曰寬曰靜四者皆公學術中舊物今特舉而措之  
云耳昔者虞之風化暨及南荒周之夷廬尹有常德曰  
暨及則但遠服從而已非必其一體華風也曰常德則  
又久於其道以待之非必其刑政可齊也公其體虞周  
所以治民者治民哉能如是則是亦於周家邦宅優之  
入而陟明之典報功之賞將於公之身見焉外遷藩臬

內陟卿尹夫何遠之有灤水風清棹歌既舉遂拂素練而敬書此為他日張本云

送閔乾知漳浦縣序

漳浦居閩會之極南去京師萬里地曠土沃其民務本而好文不事末作最稱易治也然歷今數十年來長邑者率難其人間一二以循良著亦未克大顯用此豈子男之爵為未美歟抑亦職承宣者非邁於耆年則由於少俊云耳夫邁耆年者雖老成然心力已耗不足成功由少俊者雖英銳然治具未熟多至領事斯二者豈足以仁吾漳浦哉若今新陞令浮梁閔侯乾此則遠不邁耆年途不由少俊而心力彊治具熟允合中道者歟蓋

侯家世素業儒至侯而益振起幼時讀書為文卓有大志甫冠遊四方徧交縉紳君子學益博焉既壯遂以制科舉授浙江之海寧縣丞九載績最擢知開封郕城以居憂去服闋調今任侯在海寧時克廉以律身勤以集事於愛民如其子於治官事如其家事馭吏有法處僚屬有禮凡所奉行上不可以勢而屈也下不可以利而誘也政蹟用脩名亦隨著然則忠良顯遂膺茲超擢豈無自而然哉夫慎終如始此德所由積亦治所由成也侯惟無替其初心移所以仁惠海寧者轉而仁惠漳浦則鳴琴製錦之餘又將不次簡拔旌乃卓異其始也由縣佐而陞邑長其終也由邑長而進大夫事業之隆功

名之盛福履之昌且遠殆未可量焉侯敬懋之侯有子  
鳳從子弘俱領鄉薦上春官彬彬文質寔致顯顯蓋能  
善教以慈於家必有善政以慈於國予固喜聞而樂道  
之也侯之行漳浦人咸喜得古慈君而尚書禮部主事  
吳以時請贈之言書此以吳矣

### 東陽丁氏族譜序

古者天子建德因生賜姓胙土命氏當時宗法蓋甚明  
也夫自宗法廢而君子始講譜牒其制雖殊其親親之  
意一而已矣丁之先齊太公之後太公生伋伋支孫以  
謚為姓此其始也歷兩漢唐宋以迄于今上下數千年  
子姓扶疎分蕃四方蓋不可勝紀焉昌江之丁則自撫

州始遷通城之新安又自新安徙東陽故今為東陽人  
丁之彥有諱淵者字本澄以賢能從事郡曹授冠帶謁  
選天官乃倣歐陽遺制而為丁氏譜系斷自祥一府君  
為始者譜其所可知而已祥一五子其長子行六生丙  
五丙五三子其長子千五生應清應祥俱再傳世缺次  
應成三子長必先淵高祖也次必勝必能俱善友愛克  
振其家必先二子長福貴生志大次德貴生志銘志銘  
生淵上泝祥一凡九世幾三百年矣必勝三子明貴惟  
貴俱抱德弗耀仲原貴由賢材舉屢官戶部郎中授  
誥封父二親而又有子若孫焉究自祥一以來世累德  
善慶源深長至原貴而始發至本澄而益盛且蕃將謂

服窮則遺澤寔衰此譜之所由作也人道以親親為本  
親親則人倫明人倫明則風俗厚是編高玄繼統生生  
無窮統疎合離會萬為一親親恩篤蓋庶幾古宗法之  
善由是而人倫益明風俗益厚丁之族又將有賢子若  
孫彬彬輩出其有關於世教不亦大乎本澄以徵予序  
故為書此冠諸簡元

贈屈廷秀知楚雄府序

善為治者惟在均天下之勢而不必殉天下之情勢者  
內外之勢情者欲惡之情也夫上自朝廷下至方岳州  
郡設官分職體統相承譬人之一身自五臟以達於百  
骸脉絡貫通而生其生也此而不均烏足以成治功人



之情有好內者好內則禮文熟矣而民生休戚或未周知有好外者好外則四體舒矣而朝廷制度或未親聞故專任裏臣則驕驕則不達處下之方專任表臣則野野則不通事上之道必也裏臣得牧州郡表臣得侍殿連二道兼濟厥勢惟均夫然後情通政和允升大猷也三代以下國祚莫長於漢當時論治率歸功二千石之良以今觀之黃霸以左馮翊卒史察廉遷河南朱邑以大司農丞遷北海召信臣以諫大夫遷南陽此皆朝臣守任太守也其復璽書勉勵增秩賜金或爵至關內侯或入為大司農或徵為少府列於九卿內外通融勢不偏重矧謂其肯殉情耶我朝稽古致治道隆雨澤建

官惟賢位事惟能勢與情固無所偏重

皇上復辟躬理萬幾屢勅有司簡任守令之賢乃天順  
戊寅之冬錦衣叅軍屈廷秀遂以在廷大臣僉舉遷黔  
南楚雄郡守廷秀楚之東陵人第正統辛酉鄉薦升  
監選授錦衣幕侍殿陛踰八年日親道德之光華其敷  
奏必詳明簡牘必誠信兵仗卒伍必整肅而精練受知  
于

上而有聞于朝野裏臣之賢孰踰於此以君為郡是亦  
漢循吏之出遷太守者楚雄一郡其將政平訟理不尚  
威嚴而民自化又何下漢之世邪夫衛幕理兵也郡守  
理民也兵與民本一體之相須理兵而且功成位進况

理民乎異時如漢三千石之良增秩進階入登津要預  
於此卜之廷秀之行鄉友方崇政偕諸縉紳祖餞都門  
且屬予贈以言予因舉內外之勢與人情所尚者言之  
蓋以廷秀不拘於勢亦不溺於情也

送監察御史郭用賓陞浙江按察司僉事序

國家釐天下為十三大藩而各建按察司臨之此即古  
之監司也夫連帥統兵政方伯總民事而清濁激揚一  
惟監司是託焉故監司得人然後天下之紀綱立兵民  
理而太平之治興此按察司所以不可不致隆於今日  
也近百年來海宇寧謐四方無虞獨浙藩監司尤澄肅  
多才俊閱其共與民皆輯睦康泰相安於無事之天匪

若粵蜀兩藩紛紜多事而未已此非其多角諸卿尹亮  
舉憲事以督正兵民之紀綱而何以致是哉歸善郭公  
觀字用賓領鄉薦高第教平南政化大行擢福建道監  
察御史出巡南畿督理兵政功成陞僉浙江按察司事  
將來振揚風紀之任協恭羣彛使以增重於浙藩者非  
公其誰歟初公在南畿時惓舒操縱不專於寬然其心  
則一以愛民為主姦慝者罪而遣之其威嚴凜乎秋肅  
也抑枉者辨而釋之其惠澤藹乎春和也有勢者不為  
屈有利者不為誘雖縉紳之豪莫我懼悅而其操履愈  
確乎松柏之堅貞也用是民生告安兵政就緒而公之  
聲譽亦由此振揚矣然則用昔之威以揚今之威歟昔

之惠以溥今之惠使十一郡六十九縣之間一兵一民咸知秋令之不可犯春意之不可忘允并于大猷之世而文武並用賴公得長久焉其為功業不尤美大乎大抵廩鎮一方糾繩攸繫非姁姁姑息者可以同科然予竊慨他邦部使者多求鸞鳳之美名而改膺鸛之勁操詳於惠而畧於威此粵蜀之地所以多事而未已也惟公廩明長者可與言此故撫其實而言之公燕行不少息既以嘉惠浙藩之文武進而踐華轍要躋臺端秉國憲握樞機又弘宣此威惠以嘉惠天下之文武亦寧不可至哉公敬懋之春漲潞河棹歌既舉於是舊遊羣多使相與供帳都門之外各進三爵以為公壽而戴廷璧

陳廷輔授簡於予書此以別云

送吳克明知南海縣序

天順昭陽協恰之夏建安吳侯克明以鄉薦高第釋褐  
大學試天官優等拜令廣東之南海始侯居京師受知  
遇於縉紳大夫吾翰林公卿尤器重焉南海諸俊選既  
屬編脩丘仲深尹正言為二序以贈尚書戶部主事張  
德潤行人張器之暨諸君子復喟予薦斯文之雅不可  
無贈嗟夫為士而至於決科拜官而始於百里民牧學  
為有用志無虛行彼道古今而譽盛德樹正理以勸事  
功二序已詳且備予何言哉雖然仁者贈言此昔人以  
告吾夫子者古之善治民者莫如夫子今侯學夫子而

優仕子又得誦夫子之言以申其義不亦善歟昔子路  
治蒲慮邑壯難治夫子曰恭而敬可以懼勇寬而正可  
以懷彊愛而恕可以容困溫而斷可以抑奸則政不難  
矣此言治民者當然也南海之民其亦可以此治之乎  
子游宰武城以禮樂為教夫子謔之子游述所聞曰君  
子學道則愛人小人學道則易使也此言教民者當然  
也南海之民其亦可以此教之乎至於近悅遠來與夫  
足食足兵而民信之此又言綏懷保衛之道當然也南  
海之民其亦可以此而綏懷保衛乎然則治民則恭寬  
恕斷其要也教民則學道其本也綏懷保衛則兵食信  
其大也盡斯三者則人之南海一變而為昔之東魯侯

所學於夫子者皆無負焉名增五嶺之高澤流大海之  
深吾請於他日驗之於是德潤器之作而言曰吾子待  
侯以夫子之徒而述此言是欲鄒魯我海邦曾閔我越  
民使變而之道也侯暨我民式勉圖之遂拂素練而書  
以別云

古泉八景圖詩序

往年

皇上復辟紀元之初圖新一代文獻首詔翰林儒臣取  
天下郡邑志而纂脩之予時始入館於岳郡嘉山水忝  
司筆削獨愛夫平江為縣山有連雲幕阜魯德道巖之  
雄水有昌江天地純廬汨羅之秀其為人也有李西平



之忠義黃君謨之孝友羅孝芬之高尚他如吳景思魯仕能許昌言諸公志不絕書未嘗不歎羨其山水英靈鍾人特厚為之開心明目馳神翼軫之南思一造其地親覽之叩不可得也遲六七年乃得其邑人今墊江郡守毛宏理古泉八景圖觀之古泉距縣南十里發源魯德山有泉潺湲瀉出石厓上亦名古屋下流會昌江入汨羅毛氏居其地閱十餘世矣郡守常布時嘗自號古泉樂其水也既而俊選升大學歸省因表識古泉為八景曰茶圃春融曰栢林晚翠曰蒼山暮雨曰石頂朝陽曰巨沼遊魚曰湖田落鴈曰橋頭客話曰賡口漁歌地因人勝雖久歷官守而未嘗一日忘焉間來京師彙次

縉紳士所賦八景詩為一卷屬予序首簡惟天下名山  
勝水在在有之而非其人不克樂之也克樂之者是亦  
山水神秀所產者耳若宏理其亦有稟於慕阜鳥江之  
神秀歟夫天下理寓於物格其物則可以窮其理君子  
情形於樂有其樂尤貴適其情若斯八景吾不取貴尚  
其流連光景往而不返也貴尚其於春融而悟夫元之  
始舒陽以體仁也於晚翠而悟夫貞之固執陰以成智  
也於暮雨朝陽而識夫雨以潤之日以暄之順成庶類  
也於遊魚落鴈而見夫潛者躍淵飛者戾天察乎上下  
也於客語漁歌而知夫萬物各得其所也夫是之謂窮  
理適情而不殉物不荒樂矣宏理其有得於此而名其

景以自適歟又約而會之因古泉之不息見道體之無窮因古泉之清靜悟心境之無翳此君子之學何往不在而博諸政事亦何往而不宜哉宏理誠恪端重德學兼長志在並駕齊賢良可語此而詩之所作則未必皆此意也予因序而論之為知道者勸異時秘駕南歸便道召江邀宏理相與醉寒蟾於幕阜壽丹竈於連雲歌楚辭二三闕平西君謨孝芬諸公英靈具在安得不起而一聽乎是為序

送貢廷弼陞任黃陂縣教諭序

君名瑞字廷弼初領景泰庚午京闈鄉薦明年擢乙榜高第訓導河南永城滿九載來報政有司書其績最陞

湖廣黃陂縣學教諭將之任後軍都督府經歷王功載黃人也來請文以贈其行予聞廷弼先世家蒲城宋有武德大夫諱祖文從高宗南渡始徙宣城元翰林學士仲章生師恭累官戶部尚書即君高祖也曾祖父進國初駕部員外郎其弟友達國子司業是祖宗之慶澤可謂深長矣廷弼以京闈俊選教中州有成就課銓曹列優等清資美秩循次進陞是

君上之恩榮又可謂顯達矣夫水木本源宗族為重祖宗之慶澤當思所繼承也化民成俗莫先務學

君上之恩榮當思所報稱也慶澤繼承於已往恩榮報稱於方來二者何以盡其理道耶禮曰師嚴而後道尊

然教不可一於嚴也嚴則自我峻刑書曰敬敷五教在  
寬然教亦不可一於寬也寬則自我縱法不寬不嚴無  
過不及式和民則用惇天典此則慶澤與恩榮所以善  
繼承而克報稱無遺善矣乃今天下承平日久四方無  
虞擁臯比而升講席者惟圖以利為義師道之不立也  
久矣冠章甫而進門牆者惟務枝葉繁文欲人之無惑  
也難矣廷弼故家遠裔而又稟清淑於扶輿服詩書於  
平世身道德仁義於素所履歷其必知廉公以律已使  
道本由此植立勤慎以敷教使經訓由此開明若然則  
陞華陟要內之贊郎廟外之司方岳如乃先祖仲章之  
流芳翰苑師泰之濯德司徒豈得專美於前哉書曰率

乃祖考之收行昭乃辟之有又詩曰無忝爾祖聿脩厥德廷弼其懋進之維時木落江澄霜寒遠道群縉紳相與膏車秣馬走送於月河之南酒旣三行書此以別

送歙縣令吳守謙書最還任序

歙為縣附郭新安郡今其令長以政績著聞於歙而考課居第一者予天順第一科同榜名進士夾江吳侯守謙也初守謙既登第以選授今職予偕羣龍虎為文祖餞之群龍虎懇懇舉廉勤惠愛為守謙勗今及五六年來則熟聞其節挺冰霜凜乎律已之克廉力周寒暑確乎理事之克勤溥溥公平綏懷安輯恢恢乎及民之有

惠愛太守稱其賢部使者嘉其能天官卿錄其治行獎  
勵之以為衆勸良無負羣龍虎所期待矣哉守謙既被  
恩命將還舊任其邑人建昌郡守江侯率諸縉紳言於  
予曰守令民之師帥承流宣化職有攸繫而今吾新安  
政平於上無廢事獄決於下無滯囚賦役均於四方無  
怨民賢俊盛於仕時無隋事禮讓之俗洽于一邑無爭  
鬪風皆吾令守謙作興造就之所致也蓋自數十年來  
凡為令莫有優於守謙者可謂賢師帥善承宣者願祈  
一言以贈之予因是竊慨今天下之廣環百里而為縣  
者奚啻萬計然求其克舉厥職深得民心者幾何人哉  
非過剛以狼戾則過柔以委靡非太寬以曠政則太猛

以殘民不剛不柔匪寬匪猛而允適厥中者茲於吾守  
謙見之今之還也益懋初心以永終令譽則榮名盛福  
之來崇階峻級之擢寧可量耶予嘉守謙之有光甲榜  
重以江侯之請知守謙不可以百里拘於是原始要終  
而深期以久大之業守謙最馬書此以別

送盧崇績任湖廣按察司副使序

天順昭陽協洽秋九月既望河南道監察御史盧公崇  
績以賢能遴選拜湖廣按察司副使是日

玉音甫下凡荆湖縉紳士之官于朝者無大小親踈  
咸稱朝廷得賢方岳鄉土將有所託也其章甫逢掖  
之流暨府史胥徒則動顏歡悅欣其父兄宗族有大幸



也下至兵校百工凡服役事來京師者又皆鼓舞欣美如嬰孩感父母之慈同辭愛戴其來也吏科給事中程道遠告太僕生曰凡建官所以為民而今憲副公何若是得民愛慕歟太僕生曰然民心願治亦天理之常情比數年來荆湖多事雖有藩臬諸名卿為之裁成輔相而叅贊左右集帆樯柁楫於一舟以濟川亦不能無仰於公也彼其所以歡聲雷動不可禦者豈不以民生求遂公克撫之歟吏治未澄公克汰之歟士風未美公克振之歟國章未舉公克布之歟德澤下壅公克導之歟此五者民皆仰給於公無恠其羣然歆羨也道遠曰育民生在於均苦樂正吏治在於別臧否興士風在於脩

教化明國章在於立紀綱敷德澤在於勤諮訪此皆我公之責何以盡其道耶太樸生曰是有說焉觀公昔者簪筆殿陛督按方岳時勞苦者必存問仁之愛也姦宄者必彈覈義之勇也庠校必加勉禮之恭也科條必詳布智之明也彊者必繫之弱者必扶之信之確也仁則民生遂矣義則吏治澄矣禮則士風美矣智則國章舉矣信則德澤宣矣昔日之所行即今日之所施今日之所施即後日之所法雖由此而進極顯融主憲事於天下亦無乎不可而況於一邦哉道遠曰如此則可以進我公於遠大而無負焉已矣請書之遂書以為贈行序

雙峯洪氏族譜序

東流雙峯洪氏族譜四卷今四世孫志通之所著洪氏  
有譜自志通始前乎此非無譜也蓋其族盛於宋元時  
荐經兵燹子孫散居四方文獻莫徵惟雙峯之洪自曾  
大父大賢而下圖系始可考又以正統甲子回祿之災  
亡軼弗存志通為是懼乃因本房小譜及歷世墳記之  
僅存者旁搜遠採裒集而次第之著為是書本支源派  
秩然有序於是洪氏著稱東流者亦有證不誣則其族  
之有譜雖謂始於志通可也洪之先燉煌角音共工氏  
之裔後改今姓唐有點陟使洪經綸宋豫章有四洪鄱  
陽有三洪皆業顯當世遙遙華胄何其隆且遠哉今此  
譜則斷自太賢為第一世以造端托始者譜其所可知

不敢冒承他冰以偽亂真庶幾蘇老泉作譜之遺法為  
子孫千百世的傳使有可據信也大賢始遷晉陽鄉安  
泰社之雙峯橋其子二人長先一世缺次先二四子文  
忠文信文顯文達文忠一子志遜文信四子志通志暹  
志迪志進文顯二子志通志遜文達一子志遠而志通  
及志道諸君又皆有子若孫族益鉅矣夫氏族古史官  
之所記周有小史定世繫辨昭穆故有世本錄黃帝以  
來至于春秋諸侯卿大夫名號統繫漢興司馬遷約世  
本脩史記因周譜明世家人乃知姓氏所由出唐有貞  
觀氏族志元和姓纂路敬淳姓畧柳沖族姓系錄當時  
紹紳之流無不明習乎此自五季喪亂其學遂廢於戲

崇德重功尚論氏族聖人所以維持天下別婚姻厚風俗扶世教大宗小宗之法幸賴以久存而不替者豈可輕視之哉今洪氏所從來甚遠志通獨慙慙焉推念本始究心於譜牒迄能補缺為完尊尊親親之道藹然可見誠為知所本者繼此而賢子孫世寶之守而弗失其為福慶寧可量邪志通名亭以賢能從事拜扶溝縣幕再任華容縣所至以廉能稱年甫五十餘即謝事歸予因竊慨世之享高爵者大抵沉酣利祿老益務得而志通作賓縣幕乃克勇退急流且其歸之日囊橐蕭然足可表出之以激勵頽風者故為序次此譜使識者見之庶亦知予心乎

青山白雲圖詩序

釋無極脫俗鄴陽來京都禮大覺月菴大師為弟子於  
所以息心淨垢證覺之術有得於大師者多矣間遊江  
湖樂青山白雲之奇勝而與相契也遂命善畫者繪染  
為圖屬縉紳士暨縉羽能詩者賦詠之而請序於予夫  
積土成山草木生焉鬱乎長青亘古今而不變質之凝  
於下者堅也山川出雲層寸而合白光爛然不終朝而  
彌四海氣之浮於上者厚也以青山而貯白雲遠而望  
之興逸心飛若翔翔乎寥廓之表近而即之神乎意合  
凡秀麗悠揚之景朝夕在茲可絃可觴可嘯可詠此非  
離塵卓立超出庸流而不累於世者烏能知此而嘉尚

之哉無極是圖志趣已高詩以倡之理亦宜矣雖然吾聞金仙氏之教祖空寂而宗虛幻直指心性以歸無為凡天地間物皆不為我有而無所用之也豈惟天地間物不為我有雖我身亦不為我有而欲遺棄之也而何有取於彼蒼然其形皎然其色者以為事哉意者寄興於山而不為山所繫寓意於雲而不為雲所拘歟蘇子曰力生於所激而不自為力故不勞形生於所寓而不自為形故不窮試以是觀之應乎有得矣意雲在青天山絕點埃此固沙門師所以開覺路而悟最上乘者無遠予之言而滯山雲之迹斯達大慈要旨以見其性也大師聞吾言而深善之遂命無極書之以冠於諸作

順天府鄉試錄序

聖天子重明麗正化天下成文明之治已閱十年餘維時

上下交孚明德光顯萬象煥新故日月星辰麗乎天而天之文以著百穀草木麗乎土而地之文以弘易書詩禮春秋之經麗乎人而人之文以宣朗况京師首善當離明之地萬邦承式環拱仰瞻文化興行洋中溢外視四方尤甚盛焉經曰聖人南面而聽天下嚮明而治此之謂也乃成化甲午秋適當觀文取士之期先是大學選歲貢之英京學及府州縣學擇弟子貢之傑內外羣有司拔官儒吏士兵校之賢而業文者總千六百人



苛及時以來分類以竦於是府尹臣簡奏請考試官  
上委其柄於左庶子臣淳修撰臣健其同考則教諭臣  
女臣廣臣奎臣義臣廣烈訓導臣諲臣深臣璜皆起自徵  
聘監試則監察御史臣福臣釗提調則府丞臣川皆簡  
自宸衷前期十日監試提調已入院舉按國章作  
新士氣惟和惟慎戮力奮庸凡宿弊之蠹於前者一時  
悉革而至公之道京師共見焉臣等以八月庚寅陞  
辭往蒞其事相與倡合庶官對天矢心中嚴禁戒辛卯  
甲午丁酉凡三試之於千六百人中獲中選者百三十  
有五人遵制額也因鏤其氏名與其文之純粹而超  
等者彙成鄉試錄用上塵乙夜之覽下為來世之光

故事有序所以言作者之意臣竊惟自有天地即有人  
文世運流行相為表裏唐虞三代之隆早已漢唐宋以  
來在盛時則文用顯明逮季世則文隨委靡寧不繫於  
當時繼明照四方觀文以化成天下之責有未備歟洪  
惟我

太祖高皇帝完三光五嶽之氣振起斯文如伏羲之文  
之古焉時則人文光復於洪武

太宗文皇帝闡五經四書之旨亨昌景運如帝堯之文  
之渙焉時則人文大豐於永樂

列聖相承昭回制度舒廣國華又如成周之文之郁  
郁焉時則人文增益於宣德正統之間我

皇上繼體守成厲志經帷晉明道德垂衣禮殿煥  
汗絲綸而尤惓惓於科目得賢焉斯則繼明成化之責  
豈不全備而無遺哉然臣深念今四海之內人文日盛  
則風氣日開風氣日開則俗尚日侈其盛也汪洋俊逸  
或有乖於理其開也流麗縱橫或有蕩於氣而其侈也  
言人人殊遂并體制皆訛矣又況士流學文惟初試是  
詳而餘試或畧主司亦因而俯就焉此古道之所由未  
復而今日濟時之急務所當先者歟肆臣等欽承明  
詔懋圖救起以一之而雪其鑑乎其衡判妍媸輕重於  
毫釐之際遍閱三試無採所長彼襲陳腐者文趣陋  
之而進其術業精明者為好新奇者文辭巧黠之而陟

其志意中和者焉習怪誕者文義野奪之而予其態  
端良者焉趨龐雜者文格冗抑之而揚其性情簡潔者  
焉慕羸豪者文質散罰之而賞其制作謹嚴者焉約而  
裁之俾規矩準繩之不越無悖文之理也啓而通之俾  
光芒勢焰之不沈無晦文之氣也整而肅之俾紀綱法  
度之不失無壞文之體也若此者皆以救起人文使無  
過不及之弊而一歸宿於聖人之道之中惟如是則今  
日之文參諸天地而無愧驗諸

祖宗列聖而有光其於繼明普照庶幾萬一之助而文  
明治化之大成雖歷千萬世尚何遺憾歟諸君子於此  
以文成名獲膺衆舉行將試南宮對 大廷亦有位矣

則凡所以弘文明恭順之德上應於

重華協帝之君而履元吉者可不自勉乎必也恒麗乎  
中務依乎正力體陽道之剛而不牽制於陰道之柔則  
君臣同德克壽斯文於永久 國家有無疆之休諸君  
子亦有無窮之聞否則文浮於質或并其質皆泯泯無  
足觀而日流汙下焉斯則沒世無聞之可疾假科目以  
惠人之當咎者其玷斯文庸有既乎敬書此於錄元用  
考驗諸君子於他日云

同年會詩序

聖天子觀文成化之三年西討蜀川羌戎即敘東征廣  
粵徭獍輦心次及荆襄之道竊遼海之叛夷相繼平定

四邊無警中土底寧於是朝廷百君子恭膺五福之  
錫與國咸休間以餘暇作嘉會飲酒同樂天順初元  
第一科進士三百人逮今十有一年自瓊林一燕後未  
嘗通會春官負外郎彭仲英言于衆曰人生以百年為  
期方作官時已在三十年外又三十年皆歸老矣及此  
時終日戚戚而無一朝之懽不亦負乎天官負外郎楊  
宗器曰吾儕本天道以脩人事語天道則三百人皆共  
由之無異若語人事則升沈榮辱不知幾變有足感者  
然則適此時為勝遊亦豈非樂天乎相率謀於黎淳黎  
淳曰斯舉也非才過百人者不能諸公共舉其入吾用  
之既而吏科都給事中沈廷實浙江道監察御史吳敬

行薦冬官員外郎蔡克存諸公各出所有而克存總之以淳備位春坊即詹事府後堂為會凡潔牲醴具器用陳几席節禮度悉聽命克存乃三月望日羣賢畢集少者奉長者酒以齒叙坐總較舊數僅半之蓋分任南都及外藩者多也坐既定黎淳起而揚觶曰惟天地賦諸公美質父兄師友教諸公美藝

先皇帝授諸公美官所以拳拳期望於今者誠願諸公纂文學如宮殿之華國崇道德如山嶽之峙地炳功名如日星之麗天也國家氣運關係諸公諒匪偶然母以勢橫壞同年心術母以利驕毀同年節行母以才縱亂同年聰明俾四方人矜式曰是科得人最盛後世子

孫稱頌曰我先代同年實多鉅賢斯於甲榜有光無忝  
幸相與勗之衆曰謹如約黎淳曰未也古人飲酒非直  
圖為醉飽書云爾亮永觀省作楷中德爾乃自介用逸  
詩云既醉以酒既飽以德黎淳今幸飽諸公之德而自  
逸夫願從明年歲為一會庸敦風化有違約者罰以此  
解衆皆曰然於是命庖丁饋膳命酒正舉觴命伶人奏  
樂呈百戲命羣吏催進觥籌逮莫衆賓皆大醉懽甚仲  
英宗器首即席賦詩諸公皆賦凡若干首彙成一編而  
黎淳繪以為圖并作序云